

Restà tar la spertadad dal tren regiunal

Il cussegl grond è suandà a la proposta da la regenza tar l'instrucziun da medias

DAD ANDREAS CADONAU / ANR

■ **L'impurtanza da sensibilisar la giuventetgna cun las novas tecnologias da comunicaziun nun han la regenza ni la cumissiun da furmazuiun e cultura vuli negar. Sulet davart il tempo da l'introducziun da la scolaziun nun èn ins stads dal medem avis. Il cussegl grond è suandà il mardi passà a la proposta da la regenza.** Il president da la cumissiun da formaziun e cultura *Luca Tenchio* (pcd Cuir) ha explitgà il mardi passà avant il cussegl grond il motiv da l'incumbensa formulada da la cumissiun per mauns da la regenza. El è stà da l'avis che las tecnologias da comunicaziun sa sviluppeschian spert uschia che las scolas grischunas stoppian reagiar. Già scolars da tschintg onns sajan en possess da meds electronicas cun access en la rait electronica. L'offerta actuala da la scola na possia betg porscher il support necessari a scolaras e scolars per emprender dad applitgar ed ir enturn cun ils privels. Consequentmain ha la cumissiun pretendì da la regenza dad stgaffir in post da cussegliazion a favur da las scolas grischunas. «Igl è temp da midar dal tren regiunal tar il tren dad auta spertadad.» Bain è la regenza sa declarada pronta da surpigliar l'incumbensa da la cumissiun, dentant cun in pèr modificaziuns. Tranter auter da desister dal post da cussegliazion e dad realisar la scolaziun da medias entaifer il plan d'instrucziun 21. La gronda part da deputadas e deputads s'exprimida en chausa, è dentant suandada l'argumentaziun dal president da la cumissiun. *Cornelia Märchy-Caduff* (pcd Domat) ha renfatschà a la regenza da betg vesair la necessitad dad agir svelt. La scola stettia avant ina gronda sfida pertutgant las novas tecnologias, quellas sa midian svelt ed uschia saja inditgà da reagiar e da na spegtar sin il Plan d'instrucziun 21. A favur dal tren pli svelt ha er il deputa *Aurelio Casanova* (pcd Foppa) discurrì. El ha visà a

las stentas ed ils custs da la scola dad Ilanz/Glion dad instradar ina scolaziun andanta da medias e da metter a disposiziun l'infrastructura necessaria. Menziunà ha Aurelio Casanova ils auts custs per la scola da Glion en connex cun l'instrucziun da medias. Il deputà e president communal vesableras sinergias tranter las vischnancas e la necessitad da realisar svelt in post da cussegliazion era per coordinar l'aquist da l'infrastructura. Schizunt da la vart da la Partida socialdemocrata è vegnida critica vers la regenza ed il departament d'educaziun da *Martin Jäger*. *Sandra Locher Benguerel* (ps Cuir) ha medemamain punctuà la necessitad dad agir svelt e da realisar il post da cussegliazion per pudair reagiar svelt sin las pretensiuns dals novs meds da comunicaziun.

Plaschair da la tenuta positiva

Il cusseglier guvernativ ed actual president da la regenza grischuna, *Martin Jäger*, ha già plaschair da la tenuta positiva dal cussegl grond vers la furmazion. Per el è la finamira da la cumissiun na fitg differenta tar la proposta da la regenza. Il minister da furmazion grischuna ha visà a las duas pretensiuns stipuladas en ils votums da las deputadas e deputads, inagiada pertutgant l'infrastructura. Sco deputà haja el già avant onns intimà il cussegl grond da coordinar la cumpra dad infrastructura electronica per las scolas grischunas. Il cussegl grond haja vuli savair nagut da quai e las scoals sajan sa decididas per soluziuns individualas. Pertutgant il post da cussegliazion ha *Martin Jäger* visà als cust dad ina nova piazza

da lavur en l'administraziun chantunala che cuntanschien la summa annuala da 175 000 francs. Il cusseglier guvernativ ha pledentà il Plan d'instrucziun 21 che prevedia instrucziun da medias en plirs secturs e ch'i na saja betg prudent da chaminar sin dus binaris. Sustegn ha il cusseglier guvernativ tuttina anc chattà da singuls votums. Tranter auter dal deputà *Bruno Claus* (pld Cuir). El ha avertì da na betg surchargiar las personas d'instrucziun che saja actualmain confruntads cun diversas midadas e da na chaminar en chausa scolaziun da medias sin dus binaris. Il cussegl grond è la finfinala sa decidì per la varianta da la regenza cun 58 vers 52 vuschs e da surdar l'incumbensa en il senn da la regenza a la regenza cun 61 vers 48 vuschs.



L'impurtanza da la scolaziun da medias nagin che ha dubità en il cussegl grond. Disputaivla è stada la dumonda davart il temp da l'introducziun.